

《四库全书 讷溪奏疏》 (明) 周怡 撰

钦定四库全书

史部六

讷溪奏疏

诏令奏议类二

奏议之属

提要

臣等谨案讷溪奏疏一卷明周怡撰怡字顺之号都峰改号讷溪太平人嘉靖戊戌进士怡初居吏垣以言事忤严嵩廷杖下锦衣狱三年世宗感箕仙之言得与杨爵刘魁同出狱未几以熊浃劾箕仙诬妄激世宗怒复逮入狱又二年始得释隆庆初召为太常寺少卿又上疏忤中官外调山东按察司佥事稍迁司业仍为太常寺少卿以卒平生触犯权幸至再至三困踣颠连仅存一息而其志百折不改劲直忠亮卓然为一代完人是集为其弟恪所编凡吏科奏疏十一篇太常奏疏二篇虽卷帙无多而生气凛然犹足以见其梗概也卷末乞休一疏注曰李石麓相公不允上李石麓者大学士李春芳号也蓋怡放废以后不欲再出而春芳以穆宗新政欲獎用直臣故格之不使上达然怡讫不得大用殆亦如郭公之善善欵

乾隆四十五年三月恭校上

总纂官 (臣) 纪昀 (臣) 陆锡熊 (臣) 孙士毅

总校官 (臣) 陆费墀

●钦定四库全书

讷溪奏疏

(明) 周怡 撰

吏科给事中臣周怡谨题为督抚大臣罔上不忠乞赐谕责以振风纪事窃惟抚按之臣受天子明命分理一方生民休戚赖以苏息苟仰思朝廷付托之重一方瞻仰之大则所以惕心饬躬慎官畏法真如负重而涉渊冰寧肯专恣自大废法徇情自戾官方耶今天下为朝廷牧赤子专则守令次则藩臬为抚按者留意贤否钦慎自严则下观而敬畏生贤者勤而贞志弥笃不肖者惮而非念潜消其利济一方甚大况甄别严明孰敢越志近观某举劾方面守令二疏臣等窃不自安者数日某以其官则兵部尚书其权则右都御史其责则提督巡抚其地则两广实朝廷之遐方边徼朝廷所以隆其秩位重其权任非以侈大某之身盖以遠方之民蒙朝廷之德化视畿甸近藩为遠故命之重臣欲其敷宣皇化覃洽海濱如畿甸近藩甚盛意也为某者肯一念及此其所举动必不苟且轻易今于两广布按二司止举以市恩独以一都指挥金事某劾以借口两广猺獞寇窃东剽西掠日有警传文德武備不宜偏有轻重今惟举文劾武重俎豆而轻介胄非所以为劝岂惟南越之将士愤怏今西地多事之日婴锋蹈刃则责之以死命而举贤旌能独不

錄其微长搜瑕索疵独于此辈深刻臣恐武夫闻之解体难望其临敌有血战死绥之志两广所辖郡邑寔繁见任守令废怠官守者寧无数人本官于广东则劾雷州府知府叶于广西则劾柳州府知府戴及查本官及巡按同日报缺官本内柳州府知府戴已于四月初五日准告致仕卒官劾疏发于四月二十日据传闻之言戴于四月初五日已前已经离任回籍去讫又查嘉靖二十一年十一月日本官报缺官本内雷州府知府叶已于本年十月日丁忧去讫二臣之衰老败亦有年矣一则以去任踰年而始劾之一则以去任踰月而犹劾之无乃以见任者情势难言假以去任者朦胧塞责苟且欺罔莫此为大举刺本以激扬今反以长恶遂奸何可望其廉贪而贞淫耶观所劾则知所举多徇情不可以尽信观举劾一事则知经略他务多虚应不可以为赖叨窃大位大禄大权而苟且欺罔如此臣窃为朝廷不平焉臣据事论事知其无以人事君之忠其诸风闻之言不敢一槩妄渎圣听伏惟陛下轸念民瘼不遗遐方勅下吏部都察院叅论其素行议拟去留上请宸断或严示戒罚以责晚効仍令该部通行各处抚按以后举刺不许徇情市恩苟且欺罔有负任使庶官箴有严法守不隳而风纪振扬非小补也臣待罪言责义不敢默惟圣明弘纳嘉靖二十一年十二月日題

吏科给事中臣周怡謹題为竭沥血忱恳祈天鑒非常变异詔求直言通行中外痛加修省以荅天心罔极仁爱事臣愚窃謂穹然上覆者天也墮然下载者地也巍然首出综天地而立极者帝也天地奠位者常也如日月星辰风雷云雾海岳泉石人物之类一失其常则皆謂之变也人君之位曰天位祿曰天祿事曰天工语曰天言礼曰天秩典曰天叙命德曰天命讨罪曰天討以昭人君即天也不言地者统天之尊也天地之常人君之常也天地之变人君即引以自咎通行警戒大小臣工各励修省期以复于常也近照钦天监奏称嘉靖二十二年正月初一日日食不及三分且日未出时候即同不食免行救护奉圣旨是钦此钦遵臣愚窃謂悬象着明莫大乎日月日月之食天变之大者也虽曰少食即同不食臣则以为与其少亏不如无亏救护可免修省不可无也正月之朔乃岁之首也月之首也日之首也其食在日未出时则又时之首也是可不谓之大变耶臣愚窃窺天象有符圣功圣人慎独之功戒慎不覩恐惧不闻盖在幽暗隱微之中人所不知而已所独知之地战兢惕厉夙夜忧勤此圣人所以能立无过之地也故曰君子之不可及者其唯人之所不见乎日之未出方食而旋复即不见是图不遠之复之象也伏覩皇上临御以来敬天勤民昕夕无间圣德格天切忧勤之心致中和之极宜天地位而万物育无少变异然古人以天变不作为天意忘弃以天变之见为天心仁爱是则天变实所以资圣功也且承君之命而致之民者臣也夙夜匪懈以事一人臣之职也臣职不修则化理自亏天象之变必不虛生近照礼部类奏灾异奉圣旨是上天仁爱灾异迭见以示警告事关朕躬的知道了便通行各该衙门官员痛加修省尽心职业共图治理以回天意钦此钦遵臣有以仰见圣心恳切不自满足诚尧舜其犹病诸文王望道未见之心也视彼遇灾而惧侧身修行者大不侔矣夫既通行修省臣似不必贅也而复喋喋者窃

以忧勤惕厉而无间者圣心也安常袭故者臣下之积痼也类奏灾异乃礼部每年岁终之常例也其不以常行文移了未完故事之心视之者鲜矣更望皇上俯念元旦日食非常之异特发明诏求直言通行中外各该衙门官员痛加修省共图维新之治夫直言者盛世事也故曰主圣则臣直禹之告舜则曰无若丹朱傲慢游是好傲虐是作罔昼夜頒頒罔水行舟朋淫于家用殄厥世姬旦之告成王则曰无若殷王受之迷乱酗于酒德哉夫圣莫过于大舜其不为丹朱曾谓禹犹不知耶成王嗣周之初其不宜指以亡国之主曾谓姬旦有不知耶而二臣直言如是此见虞周君臣和气洽于上下畧无猜嫌所以更相饬戒用成均衡之治所谓泰和元气在唐虞成周宇宙间诚为知言后世忠臣务为讽谏意非不美第言辞微婉未免蔽晦本意莫若直言直指尤为光明何事为今日大难而最当先务者何事为今日大费而最当先罢者何人为大贤而为今日当先举者何人为大蠹而为今日当先退者何事为今日最所忌讳而难言何事为今日最为紧要而难行者何刑为枉而当正者何赏为滥而当节者凡有關於时政务要知无不言言无不尽明白直陈毋晦正意万一所陈有可裨补圣德者不妨已精而益求其精已盛而益求其盛将见行之天下而臣民称圣传之后世而史册生辉各该衙门官员将奉德意将见贤者益自砥砺而勇于为善中才益自振作而求入于善不贤者亦知所畏惮而改行以从善矣陛下和德于上自宰相以至百执事和政于下百姓泰和于天下天地呈祥神人胥庆实我明万万世无疆之福皇上万万岁无疆之寿宗社幸甚天下幸甚微臣一念忠赤冒昧进言伏蒙天鉴虽万死亦无辞也谨题嘉靖二十一年十二月日题

吏科给事中臣周怡谨题为恳乞圣断俯从人心亟罢不职大臣以重御戎根本事臣窃惟连岁边疆大肆寇逼更番迭入残困山西震惊畿甸自古边陲之患于今为甚人皆知筹边失策由抚總之臣不职以致敌人轻忽突来突去肆无忌惮不知边臣不职实由根本之地大臣不职之所致不于根本之图而惟枝叶是务未见其善也夫御戎之要莫急于兵马钱粮根本之地莫重于户兵二部兵食不足虽有良巡抚名总兵亦无所用其智勇户兵不得其人而欲足食足兵必不可得也臣观户部尚书李如圭之理钱粮是否有经国之谋者乎今当边圉多事主客官兵所急需者惟在粮草一有不继则难以号令而策励之各镇抚臣每有题请荷蒙皇上俞允下之戶部议处如圭昏然醉梦漫不经心该部司官各以职掌呈议方且悻目视之叱言边镇之事自有边镇之臣当处何预戶部动为题覆夫寻常无事之时尚当悉心竭力变通调度以求生财裕国之道今乃于要急之日蔑视国事罔修职业闇葺无为误事不忠如此将焉用之今山西地方屡遭边寇上廑圣心轸念生灵去岁蠲免税粮二年今又蠲免二年又发内帑之银专命大臣赈济其忧深虑切真痛痒乃身之心也如圭曾亦思所以仰承德意下恤边方上不病国下不病民而有变通调度之方否耶臣又访得河南周府往岁奏增禄米价银此时戶部尚书李如圭贪受贿赂不思大计不行勘查径自覆题每石加银壹钱该加银贰万肆千余两原价每石折色叁钱伍分遵行已久尚且岁有积欠无能追纳河南巡抚都御史魏因地

方时势之难又经题奏户部宜图上下经久之计大为处置如圭竟不为之一处臣见旧逋愈加积欠新增徒有虚数而已臣闻周府闻抚臣有奏令人赉银壹万余两赂送李如圭等乃为覆题仍准加银壹钱周府分派禄米每石扣支银伍分该银壹万贰千余两以补前费遂致宗室闕然不平讦呈巡抚等衙门至今追银问罪未结夫王府系天潢一派帝室懿亲其应得禄米自有定数应增应减自有法例其屈伸盈缩与时消息是亦该部之责也如其当增则亦当查前此何为而不增及今时可增与否明白议处请自上裁岂可贪受贿赂以私卖耶如不当增则枉法受赂尤大不可于王室至亲尚敢奸贪不法而况于其它耶夫以大臣而志在贪利则于国事宜其昏然而莫之理也河南见鞠其狱明证指验人人得而知之况河南连岁灾伤河南边防之费困不可支今又岁增银贰万肆千余两巡抚知其难而处之户部独忍不为之一处耶况今日大工之建边防之费日新月盛朝廷之帑藏已虚百姓之膏脂亦竭虽各宗室贤王亦知上体国忧皆有孝敬之心各献金銀以助朝廷之万一寧肯于祿米定价更欲求加以重困朝廷耶如圭职掌司农罔思国计徒负痈腫之躯四维不知无异土木之偶一筹莫展乃反徇私貪賂负朝廷之恩壞国家之政王府不沾实惠百姓日见流亡尚何望其生财足用以给边防之需耶如圭不罢欲求钱糧之有调度充足决不可得也其兵部尚书张鑑之司兵马是果有折冲之才者乎屢经言官论劾不知求退每荷皇上姑留罔知报効凡一都督总兵副叅游备之升补无非平时贿賂之私人其贿賂者岂皆尽取诸私囊无非借贷于巨室一得升补即遂刻剥军士以偿债肥家如此用人安望其有奋不顾生舍命敌忾者乎今虽痛念边毒重惟主忧不受一賂而用智勇之将其为用者亦确信素日之心术而深疑今日之举用以为危急之日虽举用不计而馈賂之乏终任用不坚后之继今者亦犹今之继昔也今日何赖于鑑而尚可任用之耶以为福将耶则今日折冲非才明矣以为罢鑑则无能代者自古无借才之忧堂堂天下岂以无人为患耶往者陝西奏徼幸之功本兵先蒙殊賞荫子锦衣该司郎中王即升应天府府丞今日山西屢至失事巡抚总兵寘之重罪则本兵亦当先受显戮其仍有当连及者亦宜详议可否岂有成则先论其赏败独不可分受其罚即近日敌寇山西抢掠二十七州县孳畜一空子女尽去杀伤之惨尤不忍闻兵部近议用夜不收三十名在京常川往来爪探消息缓急以为之备巡抚山西都御史刘乃厚赏之该部复厚劳之令其勿言山西之惨止言边寇已困杀马而食职方司郎中杨公然扬言士夫庆敌之困以懈众心以罔朝廷鑑等职掌本兵九法罔建乃互为欺蔽上负圣眷而不顾甘心貪昧下犯人言而不恤尚何望其折冲万里以制边寇之横耶张鑑不罢欲求智勇忠义之将决不可得也是二人者不宜一日居乎其位者也其提督十二团营兵部尚书刘天和年垂衰暮日薄桑榆步履艰难足欲前而屡却气血衰惫志欲锐而莫遂昨观各城门扬兵之议有同儿戲此可观谋矣团营之兵挑选精锐内以为王室干城之重卫外以备四方不虞之援救必须精敏奋厉之臣以提督之则可以作六军之生气以备万里之长城今天和果方叔元老而克壮其猷者乎窃谓其自知必不能也重

兵要务之地非养老图安之所若用此衰惫以当重任必误国家之大事但天和壮岁自立素负重望今及衰年精神策励自不能前合无容令致仕以全晚节别简才智励精之臣以充其位则于国体军务两得之矣朝廷命廷臣集议更置抚臣博求将材又命勲臣传谕户兵其所以筹边经国必期兵食之足将帅之良计出万全战可百克大宣威于沙漠以尽灭边寇解边民倒悬之望快中外云霓之心以致圣心焦劳虑伤心血主忧臣辱分义不容已者一时大小臣工罔不思忘徇国奋勇敢忾以纾皇上西顾之忧而重要之地尚使匪人充之则无以新天下之耳目鼓中外之勇志是亦寻常虚应故事而已未见其实修内攘外为匡国灭寇之图也伏望皇上转念边陲重图根本大施威断慎简重臣或令自陈或令致仕早赐罢黜速易贤才以图亿万年长久之计以振今日中兴之治实宗社无疆之福边方再造之愿也臣待罪言职深悉时艰但知一得为国之忠不顾众怒杀身之祸惟圣明留神裁察则宗社幸甚天下幸甚臣冒昧进言无任殒越之至嘉靖二十二年二月日题

吏科给事中臣周怡谨题为纠正抚臣滥举失体事窃惟治理之要莫先于用人劝惩之机莫要于扬激伏覩勅谕巡按御史必曰劝惩得体人自敬服钦此朝廷之予夺部院之考察皆据抚按举劾之疏举劾之典诚鼓舞人才转移治乱關係匪轻不可不慎也是故举劾当则刚正廉明者定而贪暴卑謟者遠举劾滥则刚正廉明者耻而贪暴卑謟者肆矣部院据监司之举劾考庶官之贤否而监司之贤否亦于此焉辨史曰达视其所举是已何也水流湿火就燥各以类从也近阅巡抚湖广右副都御史陆杰厯论官属贤否境内人才各疏其所论荐果協公论与否臣不能悉知但平居论人咸谓才难今观本官所举未免杂滥太甚即今日之方面既有举而无劾则来年之考察宜有陟而无黜也照磨县丞非谓无贤窃谓天地似广未必若是多贤尔其一疏荐大治县主簿郭则曰县知有丞而不闻有令其一疏荐大治县知县张朝锡则曰端谨自持而民隐恤刚柔相济而邑政修夫既不闻有令张朝锡又何为而荐耶两疏并举自为矛盾其荐境内三人而廖道南与焉夫道南何如人也人品鄙劣心行污秽貪淫邪媚里閈所贱恶缙绅所不齿者即有华藻靡词不过雕虫小技非有本之学理到之言居可训俗出可华国者也已烬之灰夢想再燃既腐之木妄覩复发在道南盖昼夜未忘寝食在念也苦恨无阶可进漫自献颂希图使其在位犹当力诋屏斥以清仕班今既考察不谨奉有明旨闲住是举朝公论众以为不可而退者非若偶遭谴谪或一二人之论劾者可同日语也杰或不知而举之不明也知而举之不忠也不明不忠将焉用之杰之大槩昭然于所举见之矣臣又见近日各处巡抚举荐太滥大抵资秩已崇类皆援结自固甚者因而为利又其下也况嘉靖二十三年正月该考察天下来朝官员贤否虽曰黜幽陟明而黜尤最重若不严行申明未免承讹袭舛虛应故事贤不肖无所劝惩而治理荒矣伏乞陛下转念生灵图惟治理降勅切责陆杰引用匪人大亏忠荩薄示惩罚仍勅吏部查照该部近题准事理申谕各处抚按悉心博访务要甄别贤否无惑人言无持两可无徇乡故无偏爱憎无憸謟

佞而丑正直无庇权要而踈孤寒除抚按接任未及三月者不必举劾外其余无分遠近俱限二十二年十一月以里各具所属贤否实迹奏闻其例不举劾者明开揭帖定注的确考语另送部院查考来年考察众以为可黜者查抚按之疏却在举列则抚按连坐为妄举者戒庶举劾精严劝惩得体贤者日兴不贤者日遠而治化彰矣其境内人才务要察其才德果系天下之望去位非有不渝之罪方许论荐其乡评素短善状不闻不许徇私妄举以为他日起用之地其有违例举者罪深作俑恶同圮族听部院考察科道论劾则公是定而士风端其于治化岂曰小补之哉臣待罪该科义不容默惟圣明弘纳庶官幸甚天下幸甚臣冒昧狂渎无任战栗陨越之至緣系糾正抚臣滥举失体事理未敢擅便谨题请旨嘉靖二十二年四月初五日题

吏科给事中臣周怡谨题为奸愒辅臣欺罔专恣乞圣明早辨严絕以防微杜渐事嘉靖二十一年八月十五日伏蒙陛下勅令礼部尚书严嵩入阁辨事维时臣等即论重位不宜任以匪人既而言论纷集未蒙采纳而于嵩也任之益笃遇之益隆夫岂真以嵩为贤而任之勿貳耶抑岂以臣等之言真为未是而不用耶盖以嵩之奔走于陛下左右亦有年矣其心术之奸回行检之污秽人品之鄙劣识见之浅陋亦已照之悉矣第以目前奔走承顺颇可驱役一时未有当意者姑令承乏亦因以试之庶几感深图报因言知耻饬躬励行改恶自新嵩未必无人心者嵩因人言自陈之疏云臣之颂寃真若沉于苦海又云人泥往事为嵩计者宜蚤夜以思上感圣明简任殊遇于众怒羣猜之下耻人言显诋为讥以崇凶极丑之名痛省往愆翻图新美庶几上可以仰答圣明之万一下可以少息人言之责望不宜积迷不悟就下不返长负国恩反雠公是卒自归于卢杞裴延齡同流近于嘉靖二十二年二月内又蒙陛下賜嵩以忠勤敏达银记殊锡异数日新岁盛嵩自揣分遭际奇逢即杀身以报犹为恒情古云士为知己者死况一身复荷圣明之陶铸耶陛下锡以忠勤敏达四字岂谓嵩果能称此耶夫亦金钱愧心之意将使嵩思果忠矣勤矣敏与达矣抑未能如圣谕之责望耶反观内省夙兴夜寐勉求四字上以增圣明用人之光下以称辅臣弼君之任圣意渊深或在于此嵩自翟銮卧病未出之后幸可以专柄揽权之时凡近日陛下于在廷诸臣小惩大戒无非激励羣策共图治理中外警惕罔不戒省此即日月之明雷霆之威人所共见共闻者也为辅臣者即有票拟调旨之役亦不过贊理化育而从违可否出自朝廷孰敢窃以为威福耶书曰惟辟作威惟辟作福臣无敢作威无敢作福臣而有作威作福者必害于而家凶于而国典刑具在孰敢不钦嵩乃扬扬自窃为威福遂使待罪承恩者车马骈集于私门少不顺附者即有播弄近如王尧封其为人不齿于士论乡评人人知之嵩等不知何故乃欲援引却捏称陛下之意欲用之亲约吏部尚书许赞到东阁传示圣意比该部犹以未见的实且未推举及奉明旨再推两员来看钦此然后以王尧封推上果蒙钦点一时大小诸臣惊愕无措以为圣向方切姑各忍而未言果能不负则亦已矣如其误事言之未晚也兹南京科道等官张汝栋等各具疏论劾即奉明旨王尧封着照前旨不许推用这员缺另推两员来看

钦此纶音煥赫宸翰辉煌中外诸臣豁然痛快至明至断乃圣乃神尧舜其犹病诸不意圣明之世嵩等乃敢欺罔一至于此耶即陛下有欲用王尧封之意嵩等尤当力论其未可坚持以为不敢奉诏不宜依阿曲从致皇上有后悔也如非圣意则嵩等欺罔之罪律例昭然嵩又尝对人言即今翟銮病久不出尝以是面奏陛下房杜谋断相资臣以一身兼之为难陛下称以古昔周公亦只一人此言有无不可知诚如圣谕则嵩当毛竦汗流愧悚不暇佩服圣训永言师法可也尚可扬扬夸诩于人以自侈大耶周公之相成王其事具在方策嵩盍取以为则辅相之职莫大于进贤退不肖劝善惩恶为朝廷树风教贻典则也今多事时正求贤择才为急海内英豪不为乏人见任去任寥无数人可用者嵩可诿于不知耶知则宜时闻于上出格推用为时解纾未闻其推一贤举一能是蔽贤也不知则宜汲汲求之不宜泄泄沓沓美食安坐行呼唱于内庭外衢而已耶如樊继祖附势媚灶蝇营狗趋恶迹秽状真有罄南山之竹不足以尽书者姑举其两端言如筑城与先任霸州兵备副使王鳳灵上下通同烧砖冒破得银巨万不数月而冒破无存丧师偾军仍以为利此诚盛世之贼臣不容于死臣尚追恨夏言相为依附未究罪状若使老死牖下犹为大刑之逸近以传奉起为工部尚书兼都察院都御史湖广大木督木虽今日至急之务在廷在外未为无人何必于罪人樊继祖耶嵩宜极力为陛下陈之何未闻其出一言耶大臣歿后赠官赠谥朝廷劝善惩恶大典也见尊贤贱不肖虽身后不少假也凡大臣厯任虽久曾经论劾不许滥请已故兵部尚书张鑑在任善状无一劾疏无啻数十上负国恩下遗边患明刑幸逸于生前显褫宜行于歿后顾乃恩典备隆赠谥兼极近该礼部又题已故致仕原任南京兵部侍郎吕柟云云未究厥施方且宜隆恩典用慰贤魂兹奉明旨吕柟谥罢夫褫张鑑之官可以惩恶增吕柟之秩可以劝善恩礼所加风化所關凡此皆嵩当极言力论于陛下务使进退不致乖人望劝惩有以维世教嵩皆无一言及此则将焉用彼相哉陛下圣明天纵刚断雷轰照羣慝于隐微发大憝于将渐往昔任张孚敬则用夏言以防之任夏言则用霍韬以防之方其才猷略效也则确然任之而不二及其恶迹渐张则断然去之而无疑此陛下之神机化权默运超驾百王者也传曰人臣无将将则必诛易曰履霜坚冰至言辨不可不早辨也今遇圣明在上嵩岂敢有他哉顾其恶德日崇非心不悛圣眷益隆而怙终益甚人言殊剧而遂非殊炽（原阙）

吏科给事中臣周怡谨题为恳乞圣断俯从言官亟出匪人以崇治体事臣待罪吏科近接到一卒为大臣贪污素着恐不能仰答圣心以副倚任乞赐黜罢别简贤才以慎固留都事该南京兵科等科给事中张汝栋等论劾南京叅贊机务兵部尚书王尧封等因奉圣旨王尧封着照前旨再不许推用这员缺便会推两员来看吏部知道钦此又接到一卒为慎用人以崇治体事该吏部题覆巡按贵州监察御史赵□□论劾辅臣翟銮引用王尧封费寗等因奉圣旨是各该论荐官员你部里严加抡简遇缺从公定拟听候旨用若所荐所用不宜的着两京科道官实时举劾钦此又接到一本为大臣庸鄙不堪任使恳乞圣断速赐罢黜以重朝宁以清仕途事该吏部题覆工科给事中李纶论劾工

部尚书甘为霖樊继祖有干清议等因奉圣旨甘为霖已有旨了樊继祖奉命督催大木且留用钦此又接到一卒为恩乞天恩俯赐罢斥以息人言事该工部尚书甘为霖奏奉圣旨恭举庙建在即卿宜即出供职以副委任不准所辞吏部知道钦此臣于各疏反复讽诵慨叹不能自已此见陛下总揽干纲赫启离照因言官之论或允而径去之或下之该部因该部之执或允而申命之或示以微权批答浑然昭示惩戒使留之知愧任之为辱真天语玄机圣神衡鉴在廷臣工莫不惕然警省肃然畏服臣愚遭逢良会窃懷一得不敢不敬陈甘自负于圣明之世耶伏思陛下于言官之言贵能听尤贵能用听而不用犹不听也于羣臣之佞贵能知尤贵能遠知而不遠犹不知也王尧封幸赖圣明已斷然去之无疑大快人心其樊继祖奸佞诡秘情罪深重比之尧封不止于去而已耶臣请厯数其诡秘欺罔之大罪有五往年奉命督筑巩华城通同霸州兵备副使今升广西叅政王鳳灵冒破砖价各得银巨万八郡之民恨不食二臣之肉此其诡秘欺罔之大罪一也及边烽紧急廷推总制抗沮不往继祖被论劾却又饰词请往以掩前罪实非诚心直道此其诡秘欺罔之大罪二也荷蒙特宥仍命领其事宜誓以马革裹尸必期灭寇自赎顾乃婴城自避不见一敌不发一矢石门儿纵杀降人二百余人诈称首级妄奏捷音此其诡秘欺罔之大罪三也又奏帶帑银百万自宜敷宣德意使两镇之兵人沾实惠乃指称客兵支费不三四月而冒破遂尽及原任刑科给事中龙遂劾其老师费财继祖奏辨内以九十万原数计之尚未支使十分之一何谓费财又尝奏曰余买粮草升束未动及新总督翟鹏交代之日则已奏宣大仓场在在空虚掊克侵渔无而为有此其诡秘欺罔之大罪四也諂媚纪功科道欲求弥缝其迹事既不谐又諂事近侍之内主卒得朦胧罢任听勘幸免其罪并其勘复朦胧中止人至今恨之未已诚所谓百足之虫至死不仆此其诡秘欺罔之大罪五也又尝观兵部题覆大同巡抚龙大有查处军储马匹银两緣由奉明旨显是樊继祖前后所奏词涉虛诬不曾着实干事是继祖欺罔素着圣明久已洞照负陛下重托壞国家大事者斯人也恶同胡守中而诡秘欺罔过之使齗继祖之肉于畿甸则八郡之民可以忘劳而不怨齗继祖之首于宣大则两镇之兵可以忘死而勇于战矣夫兴大役动大众倾大帑不能为国家出一毫末之力而又因以为利是可忍也孰不可忍陛下必欲役民却敌则于继祖之罪不可以不究而尚可以复大任耶且近年边方失事之臣史陈既罢斥于前龙大有刘臬王升白爵李蓁张达等又皆擎解来京见今听问而罪魁继祖听勘未结又复大任之则法亦不足以服人为继祖者亦惧明神共殛将魂夺魄褫必不能安然以赴命也国君进贤如不得已左右诸大夫皆曰贤未可也国人皆曰贤然后察之见贤焉然后用之今继祖罪恶国人诸大夫皆以为不可不究而陛下起用之臣窃以为若出左右之誉请陛下顾左右誉之者为何如人若出陛下之特知臣不敢不谓非尧舜之一误也陛下如以臣言谬妄请试之徧询廷臣更请广布缉事人员厯访遠近如有一言誉其功而辨其枉者臣请即日伏欺罔之罪万死不敢辞也至如甘为霖庸鄙自居无他行能止以工作躡跻八座宜思遭际非常勉图报効夫何骄恣无忌

贪得无厌每幸大工为奇货据恩典为巨肆今朝廷内有不得已之大工边有不得已之大兵公私匱竭卖官鬻爵已无不至为霖顾不知耶如给事中李纶所奏则为霖尚为有人心乎欺君误国市恩分利鄙夫如此而久居重位六卿羞与为列贤者疎而遠之诚不可一日复玷清班也伏读纶音恭举庙建在即卿宜即出供职以副委任盖以大事在即使全文思院头目董之而已彼昏不知省幸不失富贵足矣又安能感圣言而知愧耶鄙夫愧辱固无足惜但大臣者国之表也大臣亏体辱朝廷亦甚矣伏乞圣明秉心不貳去邪勿疑樊继祖仍令回籍听勘严责原行勘官作速秉公勘查钱粮有无侵欺首级有无诈冒奏请定夺勘官若再稽误掩匿坐以党恶一并查究甘为霖听令自陈致仕速令吏部别推在廷公清忠敏人臣数员疏请简用以代其任则虞垂作工寝成孔安非徒集事而大臣体貌亦自隆重矣重大臣者所以尊朝廷也王鳳灵付之吏部以备考察淑慝旌别惩劝分明则贤者励不肖者遠为朝廷集大事驱大怒不患无人也如继祖辈不复究治屏斥彼必曰我欺罔败露如彼而上不之责矣言事者疏我之罪如此而上不之听矣则必愈肆欺罔公为不善而更无忌惮矣奸邪得志羣臣效尤非国之福也臣职在谏诤志无回隐但知为朝廷举大欺蔽守大法持大体非为私言惟圣明试审思之臣无任激切忠恳之至嘉靖二十二年五月初七日题

吏科给事中臣周怡谨题为恳乞慎简秩卿以表式官僚以敬交神明事近见刑部问过犯人陈违法奸盗极备诸丑大秽清规皆由先任太常寺卿掌寺事礼部左侍郎金主张纵容且为媒求纳贿脱罪已奉钦依陈发边卫永遠充军金不必提问也着为民钦此臣愚窃惟太常之职专一以敬事神祇協和上下即虞典夷夔之任周礼宗伯之属关系实匪轻也若得一斋明贞静之人任之则所以表正官僚慎重祀典笾豆静嘉八音克谐将见百神胥悅万福来同阴阳调而雨旸时民人乐而品物育鳳仪兽舞禎集瑞从泰阶平而王道尽矣天下太平其机未必不在于此诗曰维此文王小心翼翼昭事上帝聿懷多福又曰肃肅在庙又曰于穆清庙肃雋显相济济多士秉文之德对越在天骏奔走在庙此见文王事天祀祖尽其诚敬而显相多士皆秉文王之德恭惟我皇上敬天尊祖精一无二仁孝诚敬于文有光其承事骏奔决不可以匪人参之今太常之卿即显相也其承郎乐舞即多士也伏思皇上夙夜在公恭默思道其欲慎简此辈盖恒轸宸慮未间也乞勅吏部慎选其人以帅其僚属或词林耆宿或卿佐名贤无分在位在家务求道德纯洁文学渊闊者俾充其任则精白诚虔静共厥位上可以仰充皇上之显相幽可以协赞神明之孚格其诸僚属多士表式有仪斋明成风天人之际感通之妙真有不可以言语粗述者当堯末见千慮微忱倘蒙圣明采纳神人幸甚天下幸甚臣愚不胜恳切惶悚之至緣系慎简秩卿以表式官僚以敬交神明事理谨题请旨嘉靖二十二年五月日题圣旨该衙门知道钦此

吏科给事中臣周怡谨题为恳乞天语严谕中外诸臣以重新命以责安攘实效事臣伏见皇上以连岁边患残破山西门庭之寇堂奥之忧昕夕不寧慮伤心血其欲修内

攘外无时刻不在念也顷因言官或归咎边臣抚总不得其人或归咎大臣户兵不得其人荷蒙陛下纳谏如转圜悉俞其言亟令所司集议必求其可代者赫然英断中外一新一时大小臣工肃然警惕罔不内省曰大圣人之作为真如风雷之迅蛰无不启立无不偃者矣又尝阅辅臣严嵩感激圣谕而陈言边务一疏内有曰方今内外诸臣每遇敌一寇边则皆惊惶以为患在不测寇退则遂泰然以为无事不复关心明年夏秋之交戎马将至又复惊惶日复一日岁复一岁更无驱攘之策斯言深中时弊一时大小臣工惕然惊省人罔不自喜曰有宰相忧国如此何患内治不修外患不息也耶又见秋冬以来半年之内自宰相以及九卿之长外自巡抚总兵以及兵备之员尽更其人一时大小臣工翻然改观又罔不自庆曰用人如此又何患事功不成而太平之治不可见耶夫以天朝之大御彼边寇之微似不假余力而摧枯拉朽之无难也然非君相聚精会神注意于彼则中外人心窥窃其意向轻重而为敏怠亦孰肯奋发而勇作也今也君忧于上相忧于下中外羣臣上体君相之忧下恤边民之困荣感新命大奋忠勇精神气焰必能不假声色自足折冲万里之外何彼蠢尔小寇有不胆落心寒而奔窜者乎臣愚私忧过计犹以为易作而难久者意气也难得而易失者几也易去而难得者时也皇上轸虑亦以边报之日殷相臣懷忧亦感纶音之恳切是皆意气所发臣窃计相臣今日之忧不识视前日之言何如也是则微臣之所忧也外而各边巡抚总兵一时尽易而新之内而戶兵二部尚书俱易而新之乘时构会各砺乃志各淬乃力司农则思所以区画平时何以使粮饷之日足有事何以备赏赉之不乏司马则思所以区画何以运筹帷幄何以折冲万里巡抚则思所以区画地方之责何以塞之意外之变何以图之总兵则思所以区画何以使我兵有勇而知方何以使外寇畏威而遠遁精神鼓舞政令严明罔不在厥初此则几之所不可失者微臣之所忧也往时料敌者则曰秋高马肥敌志乃南今一二年来入夏即张皇矣以今计来岁之事只在春三月之间尔日月易迈如驹过隙年复一年坐驰岁月每至临事徒切噬脐之悔亦何益哉苟有上体君心下恤边祸者必卧薪尝胆爱日以图中夜不寝以谋安攘矣寧肯泄泄优游乃效燕雀处堂尚幸突决栋焚之未及也此则时之所不可失者微臣之所忧也传曰君命召在官不俟车在外不俟屨今戶部尚书王果尚未见其赴任是何濡滞也兵部尚书毛伯温素隆时望极荷帝简迩者莅任革弊一疏未惬众心将官贿赂之行全视本兵部好尚何如昔杨绾以清名俭德拜相之日郭子仪方宴客即減坐中声乐京兆黎干即減驺从中丞崔寔亟毀撤第舍诚使门庭貞肃则贿赂灭影不令而自畏也假令素志饕餮则钱神蝇集虽禁亦不从也故曰其所令反其所好而民不从弊非当不革也此亦新政常行文移即张瓚昔年未必无此举也所望于伯温非常谋猷当不在此而李蓁张达之议复尤骇众见使伯温选将而惟二罪之惜则年来御寇气势亦已兆见于今日矣李蓁张达而非罪也则此时宜内论不宜轻拏前轻易而拏解今轻易而放纵非惟观者窃笑臣谓李蓁张達亦必心笑之矣况二罪之才非可孟明韩信之比又何必恋恋于彼以重伤国体也荷蒙圣明英断仍以二罪付之法司

员缺另行推补中外人心始帖然畏服军法严重非同儿戏矣伯温时望所归而臣言如是所以责备贤者不自知其言之过也各边抚总之臣今易已数月矣未见建明大议振举大策臣窃恐诸臣新易不大惩创振作是大为新命之辱微臣之所忧也伏望皇上痛惩往事大举新图赫然斯怒严谕诸臣务令各勤乃职各竭乃才内则居中制外外则捍外卫内中外同心将相协力上以仰副皇上之新命下以俯答天下之风望近以安边圻之军民遠以威沙漠之小丑无袭覆辙无骋虚谈无失良几无玩良时果能建功着效朝廷当不吝爵赏如其玩时致寇许臣等科道官指名叅究必寘重刑曾谓以天下全力精简时才竟为区区边寇所奔走臣窃耻之仍乞严促王果上紧到任粮饷一节尤为紧要屯田盐法所当悉究冗员冗兵所当裁革近见有欲议加赋者此万万不可即今四方水旱无处无之户部差官催征累年积逋则可见常赋有不解纳者矣而尚可加耶与其加赋莫若节用与其加赋于民莫若減俸于官不泥常格必有权宜漆室之女尚知忧葵微臣待罪言官私忧过计惟恐有不及者而敢谓其言之过耶惟圣明留神则一怒而作中外之志一怒而安天下之民宗社幸甚天下幸甚臣冒进狂言不胜激切恐惧之至嘉靖二十二年五月日题

吏科给事中臣周怡谨题为慎选久任遵明旨惜贤才以裨治理事我国家因时立制则周建官六曹分职序贤程能非以遂私维以贊化吏部为六曹之长百辟之刑也职掌最重铨考尤要盖以进贤退不肖其责大也得其人则俊乂登庸儉邪遠屏治化之不畅也鲜矣匪其人则奔竞盛行谀諂得志治化之不蠹也亦鲜矣此文选考功为最重而当慎选之选得其人又当珍其材而久任之久自当殊其秩而超擢之以昭劝也臣伏覩纶音今后文选司郎中着久任云云钦此文选久任则诸司在其中矣此可仰见皇上序贤惜才之遐意也近观吏部卿亚并贤属僚咸励翼翼将事明明布列上下帅承师师协济诚可谓慎选矣臣独惧久任之未讲尔窃见自奉明旨以来文选郎中林春以病卒于官继春者考功司郎中高耀也仅及五选未周一年已升太仆寺少卿继耀者稽勲司郎中王与龄也耀之贤不及与龄升之骤任之未久人固不甚惜也今与龄调任以来精白一心尚贤抡才见任者序其劳资闲废者拔其德望无幸进无淹任又照得考功司郎中郑晓持心公平核实精当题覆敏速夤緣杜絕明足以行其公果足以成其敏近虽意见不同要非私蔽为害是二臣者中外孚协物议攸同不易其志均可谓贤也已臣独惧其照常序迁则于二臣任不尽其才事不终其志而后来继任者虽才志不异而谙练终殊况嘉靖二十三年适当朝覲考察之期考功郎中尤为紧要于此遽易其人深为未便今后吏部主事有缺湏九卿之长会举其司属之贤者充之务要行履端庄学问粹美器度弘达无徒取其科第之崇门径之捷但有嘱托即非贤士他日考察即以坐之是亦备慎选之一节也臣愚伏乞勅该部遵奉明旨文选郎中务要久任不许一年辄用推升仍乞限以三年为准今后再有违旨不及期而升者许科道官叅糾考功郎中每当内外考察近期一年之内不许推迁以遂推避庶贤才彙征不肖者不得以幸进贪昧速黜钻

求者不得以遂私官称政良化行俗美太平治理可计日而待也臣待罪该科义不宜默于圣明之朝无任真切愿望之至緣系为慎选久任遵明旨惜贤才以裨治理事未敢擅便謹題請旨嘉靖二十二年五月日題

吏科給事中臣周怡謹題為內外大臣不和乞賜天語嚴責以敦國體共濟時艰事臣惟人臣事君無分崇卑無分內外皆以盡心體國為忠協力濟事為和舍已從人為虛忘讎序賢為公自古及今未有不由此而臻治理者也况卿輔大臣爭于朝撫總大臣爭于邊而求修內治御外侮萬無是理也近知內閣大學士翟鑑嚴嵩與吏部尚書許贊不和互相讎訐及查兵部先因大同總兵周尚文奏討錢糧馬匹題覆疏內知巡撫總兵不相協和近據督理糧餉右侍郎趙廷瑞之疏又知總兵張鳳周尚文與總制侍郎翟鵬及督餉侍郎趙廷瑞俱各不和人持已見各自為心此大不祥之事誤國大禍目前立見臣請先論其理而后及其事易曰天地感而萬物化生聖人感人心而天下和平傳曰陰陽和而雨澤降其論兵則曰天時不如地利地利不如人和和之時義大矣天地陰陽不能違也近驗之一身尤見亲切今夫心志寧靜則目之所視耳亦聽焉足之所至手亦從焉各從心所欲而効其職能然或目視而耳不聽則見聞不相符手持而足不行則物位阻而事廢其于心志所欲曷克由濟人君猶心志也內外羣臣猶耳目手足也人臣苟知尊奉心志寧肯耳目自相违手足自相賊耶故曰同寅協恭和衷哉風教之大禮讓為先禮讓之行朝廷大臣為首朝廷者萬方之所宗仰大臣者羣臣之所楷模觀而效焉必有甚者朝廷有違言之隙則諛譖之衅長于外大臣有動色之爭則攻鬪之禍流于下由今遡昔未之或易也皇上臨御以來二十二年于茲矣由初年求治之銳以及今日憂民之切宜乎天地位而萬物育太平有象而四夷來王也今陛下日事禱祀而四方之水旱災傷未能消也歲開納銀之例而府庫未能充也歲頒蠲租之令而百姓未能蘇也時下選將練士之命而邊境未能寧也此其故何也良由陛下勞心焦慮于上而下未有肯將命之臣也今何时也以內則財貨匱甚而百役繁興以外則強敵驕甚而九邊虛耗為輔臣者宜如丙魏同心輔政房杜謀斷相資夙夜匪懈畏天命而悲人窮凡可以利國家惠小民安邊徼者无不精思詳畫上以啟君心下以勵羣工可也夫何大學士翟鑑嚴嵩憑籍寵靈崇已徇私播弄威福市恩修怨聞二輔臣在內閣有違言失色入見陛下各有私陳背讎是二臣已不和矣何望其同寅協恭和衷以事上而風下也輔臣以至九卿百執事位有崇卑均之為耳目手足聽命心志以共成一身者也宜相濟而不可以相賊也輔臣真知人之賢不肖宜明告吏部進之退之則人心攸服不宜挾勢徇私以不可服人者屬之進退吏部宜有真心真節如貞女烈士使人望之知畏雖權貴不敢以非義相干不宜依阿奉承一啟順端而后不可逆也今嚴嵩威靈氣焰凌逼百司招權攬威使凡有陳乞疑畏罔不奔走其門先得其意而后敢聞于陛下中外之臣不畏陛下而惟知畏嵩也翟鑑則依阿委靡不能張主而氣勢之弱猶不足以驅人之趨附名位之先亦足以為嵩之妨礙尚書許鑽兩世三居吏部亦可謂世臣矣雖曰小心謹畏而直氣正色不能預銷权

位要求之心弱亦甚矣凡此皆陛下之洞照知臣言之非诬也诗曰有来雍雍至止肃肃相维辟公天子穆穆此盛世之气象也今卿辅大臣阴挤阳排互相诋讦以陛下为何如主当此时不思培植元气爱护人材共图折冲御侮之计而务修私怨果何心哉臣恐大臣不和则愒邪细人乘间抵隙互相党比媒孽启衅非国之福可惧之甚也往时论劾辅臣御史如谢瑜童汉臣相继假公事而罪谪之去矣其伊敏生喻时等亦已露于声色直言敢諫之臣于权贵虽不利于朝廷则大有力也今皆假以公事奉有明命罪之谪之臣恐自是无言者矣陛下之臣虽有如梼杌驩兜谁复言之非国之福可惧之甚也今入秋宣大已报声息而文武总制大臣各立门户各持意见平时既藩篱扞格不相和协则必无长驭遠驾之策临敌掣兵按伏对垒将见甲可乙否彼是此非正臣所谓目视而耳不听手持而足不行其不误事败谋臣不敢信也初设总制总督大臣欲其权力足以制三军之命如頤气指使可无不如意也今乃以相抗各自为大而耻相下各自为是而耻相用是假之权位以相角而非为卫国御寇谋也大敌在前而文武构衅非国之福可惧之甚也臣又见总督两广兵部尚书兼右都御史蔡举劾方面守令官员内举布按两司而劾一都指挥金事又以去任踰年踰月二知府劾以塞责举文劾武苟且欺罔殊负朝廷简命重臣抚绥遐方之心殊失鼓舞文武经略地方之术今当致力中原宣威沙漠之日于忠勇将官宜折节优礼下之结其死心庶可得死力也使韩淮阴无萧相国国士之知终于遁去岳武穆不有内制其禽乌珠强宋室当无难也今诚有韩岳之将寧肯低眉俛首受制于文墨刀笔之吏耶务湏推赤心置人腹中明大义激其烈志有所异同明白晓谕不宜輒为裁抑以挫辱之为将臣者亦宜乘时立功奋勇先登以作三军之倡不宜妄自尊大自取侮辱由是而人和所结坚利于金汤又何患黠寇不成禽也臣又闻近日边事内外掣肘文武诸臣诚喜于被论而退信如是则上负朝廷推轂之心下解三军死绥之志庸懦不忠召敌人轻视之侮为国大辱误事非小也臣愚无知伏乞陛下大明离照赫施干断无惑近论无忽遠图戒辅臣毋务修怨以窃威福戒吏部毋务依阿以轻黜陟戒抚臣无辱将官以离士心戒将官无懷小忿以误大事此皆目前紧要不可一日缓者也更望陛下优容言官博采羣策虛心听纳先务和德于上则大臣自尔公忠为国虚己忘憊各务和让于下羣臣肃雍百姓泰和人和薰蒸神之听之终和且平区区外侮有不足攘矣此皆系于陛下建中和之极以先之臣微小无知窃见时事大伤国体私切愤鬱恨力不能排闼以号诉于宸前诚得天听而见之施行则亦可以报陛下禄养洪恩万分之一即日赐死所甘心也他日暧昧制于辅臣之手如谢瑜童汉臣輩陛下能知之乎臣愚无任战栗陨越之至惟圣明覆照宗社幸甚天下幸甚緣系内外大臣不和乞赐天语严责以敦国体共济时艰事理未敢擅便謹题请旨嘉靖二十二年六月日題

吏科给事中臣周怡谨奏为恳乞天恩认罪回话事先该臣题为内外大臣不和乞赐天语严责以敦国体共济时艰事等因于嘉靖二十二年六月二十九日申时钦奉圣旨周怡这廝所说诸臣不和负君致祸都是然本心初发只是讪谤曰朕日事祷祀不知

先务和德于上人和薰蒸神之听之夫朕事天礼神多荷洪庇至于四方之广岂得都无水旱若论天下治安则你每凡为有位者果能秉公竭忠修和尽诚同心赞主何患不治安焉他每内外诸臣不和你每知道如何不实时指名劾奏至此日纔说着从实输情回将话来钦此臣闻命自天惊悚战栗不知所措委的昏迷狂妄悖乱荷蒙圣恩洪大不即加以斧钺且令臣从实输情回话臣恭捧纶音委曲详尽伏地叩首号泣仰叹曰大哉真圣人之言也其容臣真天地之大也其知臣真日月之明也臣复何辞縁臣愚昧窃覩圣明孜孜求治敬天忧民昭格上下诸臣不能仰体各修私怨诚恐上负君父下误时事心切虑之欲效犬马之忠陈于陛下而臣之知识短浅辞不达意遂至狂妄悖乱上渎天听臣之罪也又不能早见预论臣之罪也伏乞圣慈弘扩覆载之仁大寃斧钺之诛矜臣之志赦臣之愚臣恐惧昏迷不知所云不胜悚仄陨越之至为此具本亲賚谨具奏闻伏候勅旨嘉靖二十二年六月日题 奉圣旨这廝本心欲讪君上且怒吏部不与太常用人同说假以弹劾为名实是结党害善况这廝每所恶内直诸臣以为贊事大道好生悖肆无道着锦衣卫拿来午门前好生打四十大棍照杨爵例送镇抚司牢固■ 〈木匣〉着监候

太常寺少卿臣周怡谨奏为感激天恩深厚竭沥血忱以图报万一事窃惟受非常之恩者当有非常之报遭希世之遇者当陈希世之义臣狂愚小臣不识大义原任吏科给事屡荷先帝知遇感激图报于嘉靖二十二年因论辅臣严嵩等擅权内有先帝日事祷祀未能殄四方水旱之灾致怒廷杖下锦衣卫狱■ 〈木匣〉系五年再逮再释当时人皆谓臣必不免于死矣幸而免死臣母在家病危属纩望臣一面而不可得人皆谓臣母子必不可得相见幸而相见复愈十三日乃终此皆蒙先帝非常之恩臣母子感激何可云喻臣举家感激何可云喻臣常思粉骨糜躯何以报万一惟朝夕仰祝圣寿万年皇图巩固庶少尽愚诚而已恭遇皇上膺天景运嗣登大宝念先帝遗诏推广德心湔涤臣罪召复臣职厯升太常寺少卿臣以五年之系万死之余两次释放生还送母终年臣之际遇至矣极矣又得耕田而食汲井而饮二十余年臣之残喘余生皆先帝之所赐皇上之所庇也臣之愿望极矣足矣何敢复望收录召用此诚非常之恩希世之遇古今以来所希覩也臣当何以仰答万一夙夜深思惟愿皇上万有千岁永保四海之富长居九五之尊子孙千千万邦协和庶几臣之野心少抒万一虽然富贵寿考子孙治安之久长者非徒然可得也必有德以享之德非徒然可有也必有道以修之学也者修德以享福禄之道也学非徒然可能也必有师以启导之必有友以辅助之师友也者讲学以修德之资也自古圣帝明王未有不由斯道以致治安者诚思法古帝王敬身修德亲贤勤学以敬天勤民则天心可格人和可协太平可致而福禄可保也大臣职专辅弼师友之官也若不与大臣相接面商可否徒以揭帖进呈则精神终不流通事理终有阻碍何以作孚万邦而感格天心自古及今未有是理古称君臣相得如鱼之得水鱼不可一刻无水为人君者可数月半年不与大臣一面语乎臣实狂愚謹據千慮一得之见列为五条开具

上闻伏惟俯賜一覽存神深思无徒曰该衙門知道此非该衙門所當知者緣系感激天恩深厚竭沥血忱以圖報萬一事理未敢擅便謹具奏聞

計开

一曰定君志以修德業君道之大在乎知責任之難在君與相古聖帝明王曰后克艰厥后臣克艰厥臣又曰為君難為臣不易皆謂責任之難勝也为人君者豈天固纵之居万夫之上得以自恣其欲自肆其情哉天地神人是主宗廟社稷是承其任甚大其責甚重此所以難也知其難則思所以圖之不可忽易古之知難者曰予臨兆民凜乎若朽索之馭六馬兢兢业业不敢荒寧日惟稽古正學明善惡之几辨忠邪之分曉然趨道之正在乎君志先定志欲為聖帝則必法堯舜志欲為明王則必法禹湯文武為之臣者孰敢不敬故曰君志定而天下之治成矣此之謂可久之德此之謂可大之業此之謂能稱君道矣伏惟存神

二曰畏天命以消災異人君為天下臣民之主所以奉若天道也皇矣上帝臨下有赫君道盡則天命眷之君道不尽則天命去之天命眷則天下臣民是依天命去則天下臣民是畔此天之可畏也古聖帝明王曰我其夙夜畏天之威于時保之然人君者天之所立也天心常仁愛之君道盡則三光明四時順風雨時百穀成萬民安君道不尽則天亦念之出災異以譴告之垂戒之欲其警惕而修省之如堯之大水則曰洚水警予洚水者洪水也湯之大旱則以六事自責今歲水灾亦以非常在內則官民之廬舍倒壞在外則禾黍渰沒舟楫漂溺糧船損壞人民溺死非小異也近報邊牆倒卸太多一時修筑實難秋高寇警大可慮也不大警省改德徒曰修省天意不可回也必幡然改念平日之所欲者不欲平日之所為者不為勤政親賢去邪寡欲一言一動必就於正道則一念之誠上格於天災異自消百祥來降矣伏惟存神

三曰敬大臣以尊師道古之聖帝明王未有不由學而成者唐虞君臣更相戒饬君臣自相師友也湯學于伊尹武丁學于甘盤太甲成王學于伊尹周公皆學焉而后臣之宋程頤為崇政殿說書必坐殿上而講后世不知此義但以崇高自大以威嚴臨下不復知有尊師之禮師傅保之職三公之位也三公坐而論道我祖宗朝優待三公之禮甚隆其于輔弼之臣必稱先生不敢以官名不敢以名稱一則曰先生再則曰先生每歷朝實錄可考也仁宗以來未之有改也先帝世宗皇帝初年于輔臣楊廷和等猶稱先生自后一輩謗佞之臣进而始卑之矣夫敬大臣者以大臣近已也所以自敬也尊師傅者以師傅成己之德業也所以自尊也不敬不尊則視之如羣臣等無有畏心何所警惕徒以官秩崇之祿賜厚之是不足為敬為尊也要在敬之以禮尊之以心迎之則喜送之若失遇之則亲亲溫言霽色商訂可否不徒以揭帖進呈如是則情意孚洽義理開明君道盡而大業成矣伏惟存神

四曰擇左右以慎近习人之所居莫大乎慎所与与治同道罔不兴与乱同事罔不亡故曰与君子居如入芝兰之室久而不闻其香与之俱化矣与小人居如入鲍鱼之肆

久而不闻其臭亦与之俱化矣谚云近朱者赤近墨者黑此理易知也况人主左右诸欲易遂服用华侈声色艷丽使令便辟善柔便佞充满前后其所言者无非荡心之言所举动者无非肆意之事一日与居志念遂移夙夜与处染习无辨古人戒之曰不迩声色又曰遠耆德比顽童恒舞于宫酣歌于室徇于货色耽于音乐流于遊戲有一于此未或不亡故曰人君一日之内接贤士大夫之时多亲宦官宫妾之时少则所以警省身心发纾志意德崇业广心泰神怡乐莫大焉内臣中谨慎小心知义理识大体者亦多其善柔便佞者不少选择而使之尤为紧要即今秋凉宜亲近儒臣日讲不宜暂罢伏惟存神

五曰勤朝政以勑臣工古人有言一日之计在于寅一生之计在于勤故曰鸡鸣而起鸡鸣则寅时也业精于勤勤则有功也自古圣帝明王必忧勤惕厉一日二日万几不勤则荒惰晏安万事隳矣传曰大禹圣人乃惜寸阴至于众人当惜分阴经曰克勤于邦又曰君子所其无逸我祖宗建无逸殿正训以勤也常朝必于昧爽之时昧爽者晦明未辨之时也朝早则精神清爽志气清明朝罢而退百官各有警惕得以修政立事非曰小补若于辰巳时朝则百官亦有年大者守候久而精神倦未免废事习久则百官因循懈怠惰慢自逸无怪乎政治之不古也伏惟存神隆庆元年七月日题奏

南京国子监司业今升太常寺少卿臣周怡谨奏为中途患病不能赴任恳乞天恩容令回籍调理以延残喘事臣年六十四岁直隶寧国府太平县人少生羸弱长益不知自爱重久病虚羸如羸卒好挽强弓竭力而断筋吐血不胜任而死矣自取之也臣之遇事前无所难自反而心以为能虽千万人吾往矣如众方百万前临即孤军深入以敌不怯但顾其理不畏其众也如事势甚难为人善袖手臣直当之不耻不鄙臣一念効用之心可识也然往往輒偾事败谋多无成功徒为世笑置而作永戒竟以此得罪幸蒙先帝鸿慈大恩寘之不死五年之内再释其生俾臣得侍弥留之母旬余而决此恩此德何厚也此情此义何日可忘也皇上新登大宝推念先朝罪臣臣贱名亦在取中召复原任随升秩方南太常即改北寺臣于其时亦奋不自量名为报効不知实已陷于大罪随奉德意往海滨莅事一年心神爽快但山箐海怪臣羸弱之躯终不胜任当时贪任其事不顾有后之难今来南都事虽无劳而积劳始发遂大不胜任去年戊辰十一月初四日得疾起送表谒陵节下又习仪拜祝万寿节其日又上陵病躯感以饥寒遂日加重今或起或倒带病应酬至前六月初四日一卧不复能起荷蒙鸿恩补臣提督四夷馆太常寺少卿闻命跃心拜官无力志存报国气不能前于本年七个月内扶病行至扬州府地方瘦削见骨臣自度此病未有痊愈之期伏乞勅下吏部容臣回籍调理臣幸不死尚愿耕凿击壤为太平颂臣即死亦奋志地下永为国家镇地之鬼臣无任激切祈恳之至为此具本令义男周久安賚捧謹具奏闻伏候勅旨

讷溪奏疏